






Les grands-aubés



“ Popa, popa ! ” crîye-t-i Mômô


“ Dji n’arive nin à dwârmu. Mossieû li R’naud ronfèle come on couchèt èt lès soris mwin.nenut l’arèdje véci pad’zeû ! ”




Popa s'achîd su l' bwârd do lét...

“ Racontoz-m’ lès grands-aubes ”, dimande-t-i Mômô.


C’èst l’ fauve qui l’ ptit spirou inme li mia, popa l’ sét bin. Adon, i c’mince à raconter...




Gn-a dès-ans èt dès razans, dji vikeu dins on grand bwès, avou tote mi famile.
Dès-aubes, i-gn-aveut à n' s'è nin fé one idéye.
I-gn-aveut dès cis qu'estin.n' si télemint vîs èt si télemint grands qui l' mérecopète di leû tièsse aleut
kèkî lès nûléyes !



Nos d'meurin.n' dins l' tchabote d'on vî vî tchin.ne.
Il aveut div'nu come quî dîreut nosse soçon.
Di l'esté, nos-èstin.n' à l'ombe èt d' l'iviêr i nos garanticheut do frèd.




Nos-èstin.n' tote one trûléye o grand bwès... Di l'esté, al nét, avou m' fré,
nos djouwin.n' al clignète dins lès-aubes, dès-eûres d'asto, avou lès tchau-soris...



mequeto

À l'âriére-saison, al nêt, nos-èstin.n' asbleuwis tot r'waîtant li stwèlî èt
nos d'mander quî ç' qui pôreut bin viker lauvau ?



Quand l'iviêr èsteut su l' pîre di l'uch, nosse man nos-apontieut on doûs p'tit nid dins nosse tchin.ne
timps qu' nosse pa ètasseut l'amonucion.

Adonpwis, racovissîs bin au tchôd, nos r'waîtin.n' lès prumêrè s flotchiyes qui tchèyin.n' ...




Quand l' nîve rascouvieut tot l' payisadje di s' grand blanc mantia
on n'ètindeut pupont d' brût tot-autoû.


Nos vikin.n' à yute di tot è nosse cwète, jusqu'au bon temps.



Li temps passeut tot bélotemint.
On djoû au matin, li solia aveut faît fonde li nîve !
Faleut veûy lès fleûrs o bwès...
Oyi, li bon temps, d'on côp, aveut racouru !




C'è-st-à ç' momint-la qu' vosse man èt mi on s'a rèscontré !
À m' chonance, elle aveut dès bias-ouys èt djè lî a dit, come di jusse !




mequeto

Nos nos vèyin.n' fwârt voltî...

Nos-avans èbagadjî dins on bia castagnî, nin lon èri d' l'aîwe.



Chîs mwès pus taurd, à l'intréye di l'iviêr, on tèribe brût s'a cossauyî :
gn-aveut on monsse qu'ariveut èt qui spotcheut tot su s' passadje !




On s'a rachoné pad'zo l' vî tchin.ne èt d'viser li nêt au long.

Gn-aveut ni cric ni crac !


Faleut 'nn' aler !

On-z-ètindeut l' monsse, todi pus près...




Muguet

Li lèd'mwin, au matin, i nîveut à grossès flotchîyes, sins brût.
On-z-a lèyî là nosse castagnî èt nosse grand bwès, po todî.




On-z-a stî chake di s' costé tot cachant après one place po s' mète à yute.
Mins on n' con'cheut nin l' payis èt nos-èstin.n' tot grélés d' frèd.



Pôves nos-ôtes !



L'iviêr qu'on s' rafieut d' veûy ariver tos l's-ans, aveut div'nu on laîd mama !







Nos-avans roté longtimps, longtimps.
Adonpwis, on djoû al vèspréye tote basse, moman èt mi, nos-avans adouyî on vî tchin.ne, au lon.
I r'choneut one miète lès bias-aubes di nosse grand bwès.
“ Alans-î, ça n'a nin l'aîr trop mau”, a-t-èle dit moman.



On vî R'naud n's-a r'cî : “ Moussoz rademint, i fait frèd à l'uch !
Nos-èstans d'dja à brâmint mins gn-a co one place au prumî plantchî. ”
Èt, i n's-a d'né on côp di spale po-z-èbagadjî.



Dispeûy adon, nos d'meurans véci èt c'èst véci qu' vos-avoz skèpî.
C'èst l' vraî, gn-a brâmint d' pus d' trayin qu'au mitan dès bwès,
oyi, Mossieû li R'naud ronfèle come on couchèt
èt gn-a nin dès masses d'aubes... mins
nosse tchin.ne èst là po nos garanti dès grands frèds d' l'iviêr come do solia d' l'èsté...



Muguette

Popa sorît tot r'waîtant Mômô qui s'a èdwârmu.
Rabouloté è s' lét, dins l' vî tchin.ne, piérdu è l' vile,
dandjureû qu'i sondje lès grands-aubes d'on grand bwès qui n' ègzistéye nin...

